

Коми Республикаса том войтырлөн газет



*Локтой велөдчыны коми юкөнö*

*4 л.б.*



**Тайо  
НОМЕРЫН**

Көрткерөс районса йөзлы социальной отсөг сетан шөриньсь специалистъяс Позтыкерөсса да Сөбинса томуровлы нуөдисны дзоньвидзалунлы сиом гаж.

5  
л.б.

Уна во сайын петавлөм «Йөлөг» газет видалігөн казялан: сы мында том йөз йылысь гижсьылөма. Уналөн ыджыд көсийомыс сөмын юрас на вөлөма, а өні, видзөдан да, ставсө нин пөртөмаось оломас. Зэв нимкодъ на понда!

8-9  
л.б.

Отпускалан да каникул кадө вөзьям төдмасыны Сьөд саридз йылысь шензьөданаторйөн. Саридз йывсьыс медводдза казътылөмъяс паныдасьоны мяян эрабдз 5 нэмын.

13  
л.б.

Аслас выль кывбуръясөн «Йөлөгакөд» юксьө Куломдін районса Немдін сиктысь гижысь Вячеслав Бабин.

14.5  
л.б.

Республиканская служба "Телефон доверия"

**8 июля с 00.00 по 24.00  
горячая линия**

**«В кругу Семьи»**

Помощь психолога  
в разрешении  
конфликтов,  
разногласий  
с вашими родными,  
близкими.



**8-(8212)-21-11-66**

Звонок по РК со стационарного телефона бесплатный

**8-800-2000-122**

Звонок с любого телефона бесплатный

Форум «Виртуальный психолог» [www.komiforum.ru](http://www.komiforum.ru)

**Июль 8 лунө 00.00 чассянь 24.00 часөдз «Дөверие телефонлөн» республикаса служба нуөдас «В кругу семьи» «пось линия», кодөс сиисны Семья, радейтчөм да верность лунлы.**

**Тэныд сьөкыд - звөнит!**

Республикаын олысьяс вермасын сёрнитны психологкөд, өтув корсьны-венны сьөкыдунысь петан туй, эм кө сийө матысса йөзкөд, рөдвужкөд олігөн. Став шыөдчөмыс сідз шусяна анонимной. Звөнитны позяс сутки чөж.

Звөнит, психологъяс отсаласны аддзыны петан туй!

«Дөверие телефонлөн» республикаса служба:

«Социальной отсөг» - **8 (8212) 21-11-66** (стационарной телефонсянь звөнокыс дон босьттөг).

«Челядълөн дөверие телефон» - **8-800-2000-122** (стационарной да сотөвой телефонъяссянь звөнокыс дон босьттөг).

Позьө шыөдчыны отсөгла онлайн режимын [www.komiforum.ru](http://www.komiforum.ru) «Виртуальной психолог» юкөнын.

## ТӨД ВҮЛӨ

*Гожомын тшөкыда вөрын овлө пөжар кужтөма биөн вөдитчөм понда. Статистика серти, унджык өзйөмыс артмө кусөдтөм бипурысь да спичкысь, куритчан пом шыбитөмысь, кос турун өзтөмысь.*

*Сьөкыд аддзыны мортөс, коді оз радейт вөр-ва, пукыштны-шойччыштны бипур дорын. Тшөкыда бипур өзтөны шонтысьөм, вөрын сөян-юан дасьтөм могысь.*

# Кужан-ө өзтыны бипур?

### Кызди колана ногөн вөчны бипур?

Бипур лөсьөдан-кусөдан правилө колө төдны и верстьöлы, и поснилы.

- Оз позь волыны вөрө кос төла поводдя дырйи.
- Эн өзты бипур прөста сідз, торья помкатөг.
- Эн биась пуяс дорө матө, сьөд му вылын, кос турун да яла-нитш пиө.
- Бөрйи ин, медым вөлі пуясысь 10 метра абу этшаджык. Весав инсө гылалөм кос пу корйысь, турунысь.
- Абу лөк, биасян кө важся бипур местаө либө та вылө лөсьөдөм торья инө.
- Некор, весиг зэра поводдя дырйи, эн песты бипур яла вылын, көні матын джуджыд турун, керч да тусяпу - на дорө өдйө кутчысьө биыс.
- Оз ков, медым бипур дорын матын өшалісны пу вожьяс, вөлі сісьмөм мыр, крут гөра.
- Весав бипур местасө өдйө өзйысь лөп-өгысь.
- Бипур өзтытөдз медводз төдмав, эм-ө көнкө матын ва, друг ковмас кусөдчыны.
- Дзик пыр кусөдчы, петіс кө биыс бипур сайө.
- Мунигад бура кисьякав бипур инсө, сзэся гудрав пөймсө да выльысь кисьякав ставсө, кытчөдз оз дугды пөймсьыс петны ру.





## КОМИ КЫВ МЕН ДОНА


*Иван Алексеевич Куратовлөн чужомсяньыс июльын тырö 175 во. Дерт, медводдза коми гижысь этша оліс - сöмын 36 во. Сымындатор эз удит вöчны Куратов! Мыйта эз удит гижны, мыйта мöвп эз вермы пöртны олөмö!*

# «Челядь серпасалöны Куратовлысь кывбуръяс»

Иван Куратов кöсйис лэдзны челядьлы коми небöг, кытöн гижысь окотитіс йöзöдны посниуловлы кывбуръяс да басняяс. «Козинъяс Коялы» гижöдъяса цикл поэт сиис аслас Николай племянниклы.

Эжваса «Шонді войт» 15-öд номера челядьлы библиотека-филиалын уджалысьяс да татчö во-лысьяс медводдза коми гижысьлөн чужомсяньыс тшупöда пас тыригкежлö мөвпыштісны дасътыны «Челядь серпасалöны Куратовлысь кывбуръяс» небöг. Уджыс вöлі зэв ыджыд: медводз посниулов лыддисны Иван Куратовлысь кывбуръяс, сэсяя бöрйисны медся кажитчанасö, а медбöрын нин дасътісны серпасъяс. Ставнас небөгö пырис 17 кывбур да 35 серпас. Небөггыс артмис мичаöн да югыдöн.

*Ирина САЛЫКИНА*



## Локтöй велöдчыны коми юкөнö



Июньса бöръя лунъясö юркарса уличьясын гөгöр ветлöдлісны вузъяс помалысь шуда томулов: кодлöнкö киас диплом, кодлöнкö шар, а морöсаныс пысалöма «Выпускник-2014» мича лента.

А радныс мыйта! Дерт öд, вит во зільöм-велöдчöм бöрад тайö лунъясыс медся шудаöсь лоины. Найö нин абу студентъяс, а диплома специалистъяс.

«Йöлөгалөн» ёрт Ирина Карманова таво тшöтш помаліс Сыктывкарса госуниверситетлөн филология факультетысь коми юкөн. Сöмын тай көкъямыс морт и помалöмаöсь велöдчöмсö тайö юкөнас, көть эськö первой курсас дас куимөн вөлöмаöсь. Ми, дерт, чолöмалам Иринаöс да сылысь ныв'ёртъяссö вуз помалöмөн да диплом босътöмөн!

- *Ыджыд аттьö көсьям висътавны миян велöдысьяслы терпennyöбсь да зумыд тöдöмлун сетöмысь, -* юксьö Ирина. - *Торъя ыджыд аттьö да муöдз копыр висъталам миян кафедраөн веськöдгысь Римма Павловна Поповалы. Тайö шань да тölка аныс пыр ышöдіс миянöс бура велöдчыны, пырöдчыны олимпиада-конференциясö, мый отсөгөн ми көть мукöд карö ветльвлім, кыз шуласны, мирсö аддзылім. Сиа миян дона велöдысьяслы гзонь-видзалун да шуг, а томуловлы шуам: локтöй велöдчыны коми юкөнö, тані сетöны зумыд тöдöмлун, тані зэв гажа да лöсьыд.*

*Миян корр.*



## СПОРТ

*Кöрткерöс районса йöзлы социальнöй отсöг сетан шöриньсы специалистъяс Позтыкерöсса да Сöбинса томуловлы нуöдисны дзоньвидзалунлы сиöм гаж.*

# Дзоньвидзалунтö колö ичöтсянь видзны

Медшöр могыс гаж дасьтысьяслөн - нöшта öтчыд висьтавны посниуловлы, кыдзи видзны дзоньвидзалун да кугшöм лёкторйöдз вайöдö юöм-куритчöм.

Специалистъяс дасьтылисны мульти-медийнöй викторина, кытөн ныв-зонлы колис вочавидзны Сочиын Олимпиадакöд да Паралимпиадакöд йитчöм юалöмъяс вылö. Сы бöрын томулов котралисны-ордйисисны гаж эстафетаын, тöдмавлисны нöдкывъяс, сьылисны мича сьыланкывъяс, хороводасисны да тшöтш и петкöдлисны мойд.

Гаж помын шöринса специалистъяс разöдалисны ныв-зонлы дзоньвидзалун видзöм йылысь буклетъяс да юмов козинъяс. Челядылы ёна кажитчöма гажыс да, нöшта на корöмаöсь волыны шöринса гöсьтыясöс.

*Коми Республикаса социальнöй технологияс сöвмöдан службалөн юöр серти*



«Эськө эски кө,  
Качи енэжө,  
Лэбзи тэ дорө.  
Збыльысь эски кө...»

Галина БУТЫРЕВА

# Эськө верми кө тэнө бурөдны, дойтө лөньөдны...

«Югыд ва» да Пожөг ю... Кыкнансө йитө «ва» да «ю» кывъяс. Мый пö сийö и ваыс? Сийö мортöс кытшалö гөгөрбок. Дзик öтитор, кодi сөмын миян Му шар вылын паныдасълö. Кодi, туялысьяс серти, вермö бурдöдны мортöс уна висьöмысь, сувтöдны кок йылö вынтöммöмөс, гөгөрвоо морт сёрни, оз радейт сы дорын лөксöм да ёрччöм. Да-да, овлö и татшöм ва, и оз сөмын мойдын.

«Югыд ва» - Вуктыл да Инта районъясын меститчöм национальной парк. 1995-өд воын сийöс Печора-Ылыдзса заповедниккөд тшöтш пыртöма ставмирса ЮНЕСКО лыддьöдлана гижөдö «Девственные леса Коми» ним улын.

Кулөмдiн районса Пожөг ю татшöм почёта нимъяснад оз на нимава, но сийöс öнi төдöны кызд чери видзан заказник.

Көть и öта-мөдсыйс тайö кык местаыс вель ылынöсь - öткодлуныс зэв уна, а чуймөданторйыс кык пөв унджык.

2012-өд вося июль төлысьö меным уси шуд ветлыны эколого-краеведческой экспедицияөн «Югыд ваö», Пөдчерем ю вылö. А Пожөг юыд менам грезд весьтö и усьö, и юбокса видзьясыс, нюръясыс да вöрыс меным гортгөгöрса йöр кодь мусаöсь.

И мый жö менам синмö шыбитчис тайö кык юыскöд төдмасьöм бöрын? Вөлөмкö, кыкнан ю бо-

кас эмöсь мойдкывса ичөтик сарствояс, кытысь позьö аддзыны Золушкалысь кодь ичөтик туплияс. Дерт, найö абу балыввса, ни абу хрустальысь, а ловъя быдмөгьясысь, найö зарни рөмаöсь и быдмöны васöдiнын. Сьөлöмыд шоналö, кор öти куст вылысь аддзан он öти, он дас, а уна дас гоз көм, ичөтик-ичөтик гөррдзасьöм дзоридзьяс. Кодi медводдзаясь аддзö найöс - шемöс босьтлö мичлунсыыс. Эз öд прöста тайö быдмөгсö пыртны Россияса Гөрд небөгö, шусьö сийö венерин башмачок.

Мөд дзоридз - пион уклоняющийся, комиён кө - марьямоль. Сылы и сыланкывтö сиöма, и кывбурыд кык ки вылын чунь мында. Кыдзи став вöывыв вөр-ваыс, сийö синтö пöртана мича, но зэв дженъыд нэма. Кык-куим лун нимкодясян дзоридзөн и лэбзясны-гылаласны маклөн кодь югыдгөрд бордьясыс, но коляс уна кöйдыс, кодi совмөчүкөрмө марьямольлөн гөррдзөмас. Потөм бöрас вайö сийö мөд пөвста раддун сиктса челядьлы. Чүкөртöны найöс, дерт жö, ёнджыкасö нывъяс, кодъяс ичөтсаян радейтöны тшашитчыны-баситчыны и пысавлöны сьöд, зэв аслыссикас мольяссö сунис вылö и артмывлö веж петкөдлана сикöтш. Донтöм, но сьөлөм чепөльтана мича голя вылö öшөдантор. Быдмөгсö пыртöма Коми республикаса Гөрд небөгö. Паныдасьлö ыджыд котырьясөн джум кыркөтш бокъясын.

Коймөд быдмөгыс - чөд, медматысса рөдвуж пувлы. Тайö вотöс кустыс төв кежлö шыбитлö ассыыс пила дорыша коръяссö. Тулыснас баситчö кельыдгөрд дзоридзьясөн, кодъяс öшйöмабсь дзояник тильгунъясөн, а гожөм помланьыс, августö, дэльöдчö сьөдовлөз вотöснас. Лямөдигөн пычөктыссьö чернила саяма гөрд рөмөн. Сюян кө вомад, тяпкөдыштан юмов-шома көрсö. Миянланын, вöйвылын, сийö паныдасьлö быдлаын, сөйöны сийöс вотөм бöрас пыр (ок, и чөскыд чөдъя йöлыд), косьтөмөн (кынөм висьöмысь медбур бурдөдчантор) и пуөмөн (чөдъя варенньöнад кө чайтö төвбыд юан, синмыд варышлөн кодь ёсь да ылөдз аддзысь лөö). Но и мый? А чуймөдö со мый. «Югыд ваын» сийöс вотны оз позь. Но некымын дас куст видлалөм бöрын воим татшöм кывкөртөдö: шөр судгасыс кызы куим сантиметр, а тусь лыдыс уна вылö квайт быд кустын. А миян Пожөг ю бокаын сы мында жö чөд куст видлалi и ачым чуйми, кор думысь öткодьялi аслам чужанiнысь быдмысьсö Вуктыл ра-





йонса рөдвужыскөд. Шөркодъ судтаыс комын кык сантиметр, а тусь лыдыс кык пөв унджык. Мый жө? Артмө, кор быдмөсө он вөрөд, тусьсө он вот, сетан сылы нимкодясьны пөтмөныс оломнас - сийө мөдө жугыльмыны да бырны. Тайө нө абу дивө?! Миян жө Пожөг бокысь чөдтө вотны сы мында морт арнас уськөдчывлө содтөд нажөтка корсиг-моз, весиг, буди, пузыывлө юбокса вөр-ваыс. И на тэд! Тусьыс воө быд во өткодя бура, кустыс оз ляпкав, а бытьө лөсьөдчө судны орччөн сулалыс пуяссө.

Сідз жө өд и тшакыд. Быдмө сэни, көні морт вотчө да быд ар бурпөт таялө быдманінсө. Важ йөз шулөмабсь: кымын бадьтө ёна кералан, сымын ёна сийө паськалө да йывмө. Сідзкө, миянлы ёна на колө велөдны вөр-ваыдлысь олан пасьяссө. А вермас лоны и сийө, мый Пөдчеремыд войвылын-джык, а сэни олом-быдмөмыд дженьыдик гожөм-над ичиньводз олом кодь.

Юбокса вөр кузяыс кө панни сёрни, то казялам: кыкнан местаыс озыр йөраөн, коды мусмөмаөсь коръя расьясыс да егыръясыс.

Гожөм пуксигас асывьяснас кывлан турияслыс нимкодя «курлы-курлыяссө». Быд во тай поздысьөны-быдтысьөны паськыда шевкнитчөм нюръясас.

А чери варыш, Гөрд небөтө жө пыртөм лэбач, ыджыдалө ю бокъясын зымвидзысь джуджыд изья керөсьяс вылын да тшем козъя вөръясын.

Нинөм абу гусяыс. Кыкнан юыс визув, ком черид буретш татшөминьястө и радейтө. А сылөн чөскыд яй йывсыс быдса поэма поэбө гижны. Оз өд прөста төвнас вуграсянінъясад волыны некумын сө верст сайысь сийөс йи вылө мачалөм могось. Мый чуймөданаыс: чериыс зэв асныра. Кор оз сөй, тэ коть ныр улас вайөд медся чөскыд самсө - исыштас и уйкнитас бокө. А кор сьомалөма кынөмыс, куш вугырсө кватитө. Татшөмторсө ме казявл, кор кайлим ю йылас ыджыд батылөн вөр керкаас. Кыян гут-лөдзтө, шыбитан юас, а сийө чечыштөмөн кватитө сынөдас на. Көмтөм кокөн ваас паравлі, и весиг кезйөдыштис, кор кокчөръяс гөгөр гартысны пес плака кодь комьясыд.

Кыкнан юыс - Пөдчеремыс да Пожөгыс - кывтөны-писькөдчөны, сьякөдчөны косьясөн козула вөраинті, миян ногөн кө, сук парматі. Сөмын өтиыс озырмөдө Печора юөс, а Пожөг садь быртөдзыс радейтө Эжва-матушканымөс. Торьялөмыс, гашкө, сыын, мый Пөдчерем өнджыкасө писькөдчө джуджыд изья кыркөтшьясті, а Пөжөгным лабутнөй-джык, увтасіньяс мусмөмаөсь сылы. Вот паськыд-джыка и висьтышта-нимкодясьышта аслам муса вотчаніньяс, сьөлөм дой лөньөданіньясөн.

...Арланьө нөрөвтчөм гожа асыв. Здук кежлө и сутшкысліс вөртасас доналөм шондыс. Тэрмасьомөн сыныштис вөр-ва вылө плавгысьөм зарни пратьяса юрсисө. И со бара нин сьавкнитіс асьядор енэжас быдсяма рөмьяснас. Тэрмасьөтг пуксьө выль лун. Мамөкөд варгигтыр тапиктам Пөжөг юбокса парма-ягас. Мыш сайын сьомөдысь пелькиник пестер, кианым ном борд кодь кокны-дик наберушкаяс. Лов шы топөдөмөн вөйтчывлам дзользысь лэбачьяс шыас, а сэсся тэрмасьөтг көтөдам-мыськыштам көмтөм кокъясынымөс синва кодь сөстөм лысва пиас. Асья көдзыдыс гильөдыштө унзіль вейясынымөс. Вежөрным и кокъясыным ась-



ныс нуөны водзө кыркөтш дорын сөльөдчысь ичөттик ключ дорө. Содз тырнам чукөртөм-чурснитам пинь чегана көдзыд васө и суныштам мөс вөра йөв кодь ру пиас, коді гөвкьялө-шебралө Пожөг бердса видзьяссө и увтасіньяссө. Сьөлөмыд бөрдө и сьылө лөсьыдысла и любөысла. Кысь нө сэсся татшөм мусө аддзан?..

Керөс бокъясын да косьмыштөм вутшка шор полөнысь вөйысьөны наберушкаад чөд-чөдлач. Сяргысьөмабсь-нюмунөмабсь пөрөма яг нөрысь-ясын пев пом гырся пув розьяс. Сөмын эн дышөдчы, өкты наберушкаад, төвбыд красуйтчан. Зиль көзьякәлөн тайө кадад ен ув пельөсса пызан вылын руалө нин вөсни коръяса сөмын на босьтөм выль картофель, а орччөн пу бекарысь өшөдчөмабсь джынвийө сола ельдөгьяс. Вежтө петкөдөны, сідзи и окота гурчкыны-курччыштны еджыд яя бокъяс-сө.

Но регыдөн тай помасис миян нимкодясьөмным. Варышгьяс моз локтісны татчө, тайө юбокса заказника «Моңди СЛПК»-лөн тракторьяс да вынйөра финской техника. И ойбстисны ягьясыным! Пасьвартисны-чашйисны Пожөг бокса вөр-васө. Пиньяс мунанінас вольсыштисны нэмөвөйся пожөмгьяс, а вөсниджыксө шырисны да таялісны кок улас. Паськыд восьсаиньясын өні ыджыдалөны төвьяс, вольсалөны пөрөдны удиттөм коз-пожөмсө. Быдмыссис пувлөн и чөдлөн, пазалісны тшака места-яс, звер-пөтка вешйис-пышйис судзөдтөминьясө-джык, косьмө сідз нин ёна ляпкалөм юыс.

Кык видзантор - «Югыд ва» национальнөй парк да Пожөг юбокса заказник. И кутшөм торьялана олом визыныс. Ётиас чөд тусь вөрзбөдны оз поэз, а мөдас таялісны-лоисны Эжва йывсалысь традицияс, обычайяс, оласногсө өти няйт гуранө, кодлөн гусеницаөн чашйөм-гыжъялөм туйыс морт судта и тырөма сийө арся зэргьяслөн ырзөма бөрдөм бөрын сьөд кыз синваөн. Ок, эськө верми кө, эськө верми кө тэнө бурөдны. Дойтө лөньөдны... Збыльысь верми кө!..

**Наталья ТРЕТЬЯКОВА,**  
Кулөмгін районьыс Пожөгса школа  
10-өд класс помалысь.  
Велөдысь - В.И.Шомысов



**Эм татшом  
УДЖ**

*Уна во сайын петавлөм «Йөлөгга» газет видлалігөн казялан: сы мында том йөз йылысь гижсьылөма. Уналөн ыджыд көсйөмыс сөмын юрас на вөлөма, а өні, видзөдан да, ставсө нин пөртөмабсь оломас. Зэв нимкодь на понда!*

*Тадзи жө и 2007-өд воын «Йөлөггаса» уджалысь Екатерина Микушева босьтлөма интервью Көрткерөс районса Сюзяыб сиктысь том зон Виктор Комскийлысь. Сэки Виктор сөмын на студентөн вөлі - парикмахерө велөдчис да став сьөлөмсяныыс көсйис водзө мунны овны-уджавны Санкт-Петербургө... Ыджыд көсйөмыс збыльмөма зонлөн - уна во нин Виктор зильө Питерын стилистөн. А мойвиис ськөд сёрнитны «Коми муысь» журналист Екатерина Макаровалы. Кыдзи олө да уджалө ылі сиктысь петлөм коми зон ыджыд карын?*

# Көсьян кө, и Питерөдз воан



- Ставыс ас саяд, - шуө Виктор Комский. - Көсьян кө, мед тэнад уджыд кодлыкө вөлі колана, зиль. А няргөмөн да дасьсө виччысьөмөн, потөм вор дорө и колян.

## Вештысисны кампетөн

Виктор Комский Санкт-Петербургысь стилист. Гашкө, кодкө шуас, лөсьыд пө сылы тадзи вылө лыйлөмөн сёрнитны. Од сы дорө шырсьыны, юрси лөсьөдны воывлөны Пэрис Хилтон, Вера Брежнева, Ксения Собчак, Евгений Плющенко, Яна Рудковская, Тина Канделаки, Ирина Понаровская, Николас Ломбертс, Полина Толстун, Настя Кочеткова, Данила Козловский, Ксения Раппопорт, Алёна Водонаева, Елена Бережная...

Но, а кыдзи сійө таөдз воис? Чужлөма өд Виктор Комский Көрткерөс районса ичөтик Сюзяыб грездын.

Виктор батысь оз помнит. А мамыс сьлөн кувсьөма, кор зонка велөдчөма нельөд классын. Быдтөма Викторөс Юля чойыс.

- Мый йылысь мөвпавлін ичөтдырйиыд? Зонкасыд өд шырсьысьөн оз көсйыны лоны, - юася Викторлысь.

- Да нинөм йылысь эг. Сөмын вөлі көсья мунны грездсьыс, чайті, мый чужанінын ачымөс ог аддзы. Велькыда шуа, гөрны-кодзны, куйөдөн ноксьыны көсйөмөй эз вөв. Лолөй мыйкө корис сэтшөмөс... А мый? Ачым эг төд. Дас өтиөд класс помалігөн на эг төд, кытчө водзө муна велөдчыны.

- Но век жө бөрийин аслыд туй?..

- Дзик думайттөг тадзи артмис, - шуө Виктор. - Ёртъяскөд вөлі мөдөдчам клубө йөктыны да, Яна, ськөд өти классын велөдчылім, корис отсыштны плойкаөн юрсисө кудритны. Меным сэтшөма кажитчис юрсиөн ноксьөмыс. А Яна и вөзйиис шмонитігмоз, гашкө пө, парикмахерө муна да...

- И сьлөн кывъясыс збыльмисны?

- Да. Велөдчи Сыктывкарса технологическөй колледжын. Сэки вөлі окотаджык нывъясөс шырни да лөсьөдны налысь юрсисө, быттө сійө нырвизаджык и велөдчи. Гортө вөлі воывла да сиктса нывъяслы юрси вөчала. Вештысисны кампетөн да чигаркаөн, көть и ог куритчы.







## Нева берегын

- А кызди веськалин Питерас?

- Колледжын на велөдчигөн ветлим Санкт-Петербурго «Невские берега» парикмахер-стилистъяслон конкурс выло. Сэки миян котыр босьтис мод места. Петкөдчи и отнамон, вочи искусственной юрсиысь сідз шусяна фантазийной причёска. Сысь меным сетисны медводдза места. Сэки аслым и шуи, мый быть локта Питеро.

Сыктывкарө воом бөрын заводити чөжны сьом. Экзамен сдایتгөдз на ньоби Питеро билет. Думаити, кольчча кө Сыктывкарө либө чужан грездө, сэтчө и нитшсяла.

- Кызди вермин вужьясьны Питерас? Кодкө отсыштис али ставсө ачыл вочин?

- Дерт, төдсатөгылд сьөкыл ыджыл карад. Бур, мый менам сэни сэтшөмгьясыс вөлины. Асьныс найө Комиысь жө. Медводз на ордо и овмөдчи. Медаси удж выло салонө. Но лои сідз, мый Питерын сямой эдзык тырмы. Ковмис нөшта велөдчыны Schwarzkopf Professional академияын да Wella Professionals-ын. Öни ачым нин велөда Schwarzkopf Professional Academy-ын.

- Виктор, тэ висьталин, мый Сюзябын шыринбаситин нывьясөс кампетысь. Питерын, дерт, абу сідз. Мыйджык сэтчөс модничаяс көсийоны, ёна-ө найө ыждаलोंны? Öд тэ дорө воывлөны и «кодзувьяс».

- Дерт, кампетсыд ог нин шыр, - нюмгьялө Питерса стилист. - И воывлөны ме дорө унаөн. Öткымынөн заводитасны пыркйысьны, тыдалө, кутшөмкө зі чушкөма, ме налы пыр и шуа, мися, аддзысьлыгөдз! Ог көсий, ме менсым вирөс юисны.

- А «кодзувьясылы»?

- Налы верма жө шуны. Дерт, налөн менеджерьясыс сёрнитөны мекөд. Но «кодзувьясыд» оз жө пыр ыждавны. Шуам, Вера Брежневакөд ми зэв бура варовитим. Зэв варов и Тина Каңделаки. Пэрис Хилтон вөли зэв жугыль да мудз, весиг вомсө эз востылы. А со Ксения Собчак миянлы пуж петкөдлис.

- Мыйысь? Някралин али мый?

- Кор юрсисө шыльөди, пыр кодкөдкө телефон пыр сёрнитис, сэсья пинясьны кутисны. Меным эськө эз сюр, но, а визажист вылын крайтйтчис.

## Мед ог вомдзась

- Парикмахерскөйын унаөн поп водзын моз висьтасьоны шырсьысьлы. Тэныд, гашкө, тшөтш?

- Ме пытшкын уна гусятор, - нюмгьялө Виктор. - Унаөн элясьоны верөс вылас, гуляйтө пө да овны ськөд сьөкыл. Кодсюрө весиг сыркьялөмон бөрдасыны, ковмас шырсьыгөдз бурөдны.

- Виктор, тэнад гөтырыд визажист, и, овлө, отлаын уджаланныд...

- Сийө оз менам салонын уджав. Но колө кө кутшөмкө анылы юрси лөсьбөдөм бөрын макияж вөчны, корла гөтырөс. Ми ськөд отлаын гортын уджалам либө корласны да ветывлаам. Кыкнад зэв на и бура артмө, ота-мөдыдлы кө эскан.

- Чужанитө казтылан он? Гашкө, сиктса нывьясылы мыйкө асьяныд вөзьян, кутшөмджык юрси вөчны.

- Мед ме дорө гижсясны, лөсьбөда. Ылысьяныд ог и төд, мый вөзйыны. А Сюзябын олөны менам чой, племянникьяс, зятъ, дерт, мукөддырийыс окота ветлыны, аддзысьлыны накөд, но уджыс падмөдө.

- Тэ шуда морт?

- Дерт жө. Ме пыр шуда вөли, ме сөмын ог вомдзась...

*Сёрнитис Екатерина МАКАРОВА.*





Иван БЕЛЫХ

# Тыысысь петны эз и удайтчы

А сьолөмөй сідзи и кыскө ва дорө. И ме, ыджыкодь нин дегина, гораа мыйкө мойда батымамлы, мися быть колө лэччывны увлань да тэрмасьомөн мөдөдча тодса туйөд Эжва дорө. Төкөтбө кежлад сьорысь нинөм эг босьт, ситеч сумкаысь өтдор. Шатинөй да нидзув дозйөй куйлоны вадор веретяса өти дзедасын.

Эжва дорад луннад нинөм вөчны. Сөмын мык вугравны позьө. А меным окота вуджавны мөдлапөвса Кылөг вадйө. Но и сэни пыжтөгыд нинөм жө корсьны. Кадыя берегыасыс тырөмаось кузь эжөрөн да дзөридзөн, көни поздысьомаось помтөм уткаяс. А шатиннад көть кызди он сибөдчы, сідзи он и судз ыджыд вабдзыс. Но вадлөн рыгыв помас эм векныдык курьякодь, кытчө корсьорө сувтлывлөны чери кыйысыяс. Сэни и берегыасыс топыдось. И ёкышыд да кельчисыныд мичаджык поводдяө горша босьтө. Но эм нөшта өти гусяин, кодөс оз быдөн төд. Коркө менам ичөтдырйи, колхоз кадө на, Кылөг вадсянь Паль Эжа тыөдз кодьомаось МТС-са экскаваторөн кузькодь канал. Лэдзөмаось Кылөг вадйысь лишнөй васө, кодө пө сөмын нюрзөдө орчча видзьяссө. Ог төд, ёна-ө бурыс таысь вөлі. Вад гөгөрын видзьясыс эз нин вөвны сэтшөм паськыдось. А мукөд видзьясыс нюжөдчөмаось веретяяс сайын. И сэтчө Кылөг вадйысь ваыс оз веськав. Сэк жө ёна ляпкалөм Кылөг вадйын быд төв помын черыс кутіс пөдны. Сійө өд казялө жө, көни сылы бурджык. Ыджыд ва дырйи Кылөг вад өтлаасьлө Эжваыскөд. Юысь вадйө пыралысь кульмысь черыд оз кө удит петны, сэтчө и кольччө. А кор гожөм помланьыс сэни сылы лоө дзескыд, усыкөдчө важөн нин кодьом канал кузяыс увлань. Но өд он на төкөтбөөн во Эжваөдзыд. Каналыд уна вонад

тырис лыаөн да кузь эжөрөн. И сөмын дыр нюжалысь зэръяс дырйи позьө писькөдчыны Паль Эжа тыөдз, а сэсянь сэсся петны Эжваө. Сэк жө оз уна черилы удайтчы татшөмыс. Но мый вөчан. Ыджыд ваын олөмыд век жө кыскө ловья ловьясөс. Тайөс ме төдмалі вочасөн.

Со и өтчыд Кылөг вадпомса векныдык курьяын бурпөт вуграсьом бөрын мөдөдчи канал бердөд увлань Оим веретя весьтөдз. Но сьолөмөй эз на бурмы, омөля пусьөдіс да. Видзөдлі канал вылө. А сэни бужөд улас рама визувтысь шорыс муртса вөрөдыштіс кузь эжөрсө. Көнсьорө тувсовья ваыс кодьома неыджыд джумьяс. Пыр и мөвпышті сы йылысь, мися сэни кутшөмкө васа олысыяс, дерт жө, эмось. Шыбиті нидзулөн самалөм вугырсьө пызан пасьта пемыд ваө, да табтө пыр жө кодкө кутіс бокө нуны. Быттьө ловзис пробкаысь вөчөм табыд. Муртса и кыскыны верми. Көласьөма мичакодь сын. Некодзи эз көсийи ваысь петны. Нөшта өтиөс татшөм кымынөс жө лэпті джумсьыс. А сэсся чөв-лөнь лои ваас. Мөдөдчи мөд татшөм кымын жө орчча джум дінө. Бара сэтысь сюрис сы ыджда кымын жө сын. Сьолөм вылын пыр жө долыд лоис. Сідзкө эз ло весьшөрө талунья волөмыс. Дас сайө джум паныдасис меным. И быдысь мыйкө лэпті. А сэсся ваыслөн выныс, тыдалө, абу тырмөма татшөм джумьяссьө водзө кодьыны. Шор визьөгыс муртса нин төдчис кузь эжөр пөвстын. А менам чери сумкаөй пөшти тыр лоис.

Ас кежысь мөвпышті, мый некымын лун мысти татчө нөшта на поэяс воыны вугравны мича сыньястө. Вадсьыд найө, дерт жө, кутасны водзө петны Эжваө воөдчөм вылө надеяөн. И збыльысь, сійө гожөмнас некымынысь на волі тайө канал дінас да бы-

дысь сэтысь вугравлі мича сыньясөс.

Но өд Кылөг вадйыд вөлі мөдлапөлын. А сэтчө колө мыйөнкө вуджны. Медводдзаысь мөдлапөлө мөдөдчигөн и казялі ыджыд лыа вылысь коддыськө важиник пипу веткисө. Кыскөма вылөкодь да чептөн муртса дорыштөма кызиник важ кер бердө, кодөс вайөма лыа вылө ыджыд ванас. Мөвпала ас кежысь: часлы жө чуктөда чепсө да босьтла веткисө, а бөрас важинас кыска. Ог өд гусяв. Сідзи и вөчи. Торйөді чепсө пу бердысь да кыски веткисө ю дорөдз. Пельыссө бур мортыд пыж улас жө кольбөма. А кутшөмкө кадымысти мөдлапөлысь воөм бөрын кыски веткисө важ инас да дори чепнас пу бердас. Тайө жө веткисө босьтлі и мөдысь да коймөдысь Эжва вомөн вуджигөн. Но веткилысь көзяинсө сідзи эг и аддзывлы. Тыдалө, кутшөмкө пөрысь морт, кодө оз нин вермы лэччывлыны ва дорө. А веткисө вайлөма ыджыд ва дырйи на кутшөмкө кыйдөс вылө надеяөн. Ме сэки унаысь аттьөвлі веткилысь көзяинсө. Эз кө вөв сылөн веткиыс, эськө и мича сыньястө меным эз удайтчы кыйны. А мукөд чери кыйысыясөс некор эг сулывлы. Найө асланыс веткыясөн да пыжьясөн пыр көнкө роилөны Эжва кузя либө матысса пөлөйясын да курьяясын. Колөкө, эськө и вуджөдасны мөдлапөлад, а бөрсө гортад кызди воөдчыны? Оз өд найө кутны тэнө виччысыны.

Колө шуны, ас сиктсалысь недыр кежлө пыжтө либө веткитө босьтлөмыд миян эз лыддьывлыны ыджыд грекөн. Абу өд юыд орччөн. Ивадорсянь Эжваыс пышйөма куим километр сайө. Поводнөя лоө восьлавны видзьяс да веретяяс вомөн, пока воан ю дорөдз. Сөмын ытва прөйдитөм бөрын Ивадорса чери кыйысыяс





вөлі лэччөдывлөны ассыныс пыжъяссө да веткияссө ыджыд лыа вылө. Кодлыкө кө ковмас вуджавны мөдлапөлө, юасьывлөны пыжлөн көзиянлысь. Мөдыс, дерт, некор паныд кыв оз шу, сөмын тшөктас пуктыны пыжсө важ инас. Менам бать мөдлапөлө мөдөдчигөн веқджык юасьывліс веткисө важся чери кыйысь Проньё дядьлысь. А ме вөлі корлывлa мича көрт пыжсө Паль Вась Кольлысь.

Но мукөддырйи мөдлапөлад друг ковмас вуджны, а дзик нинөмөн. Өтчыд со тадзи жө ми, куим чери кыйысь, веськалім вадорө. Но лыа вылын ни өти пыж эз тыдав. Сөмын берегдорса ляпкыд ваас плавъяліс кодлөнкө эновтөм пыж. Видзөдлім да шуим, мый вуджөдас на мянөс, көть и ваыс дзулькйө муртса тыдалысь потасьясөд пытшкас. Но колө кө вуджны, нинөм он вөч. Йөткыштчим да пөв помъясөн сынігмоз мөдөдчим мөдлапөвлань. Кодкө сынө. Кодкө васө коялө. Но Эжва шөрас воөм мысти ваыд пыр өнджыка кутіс дзулькыны-пыр-

ны потасьясөдыс пыж пытшкас. Ми өта-мөд вылө горзігмоз тэрмасьөмөн сынам да коялам пыжысь пыр содысь васө. Удитамогө нө вуджны! Берег дорөдзыс воськов-мөд эз во пыжыд да вөйи. Муртса удитім чечыштны берегас вөйысь пыжысь, кодөс пыр жө кыскыс вынйөра визулысь. Дерт жө, коскөдз көтасим. Но лунныс шоныд вөлі да, ва паськөмыд өдйө косьмис. Асьным бөрас бура и сералім. Но сөсся мөвпыштлі ас кежысь, а вөйи кө лёк пыжыс ва шөрас, өдвакө удайтчис ва паськөмнад варччыны берегөдз. Весиг йирмөг босьтліс таысь. Сөсся та бөрын лёк пыжад некор нин эг пуксьывлы.

Кокныдджык нин лои, кор верстяммөм бөрын кык ветки ньөблі ас сиктса олома войтырлысь, кодъяс эновтчисны нин вадорысь. Карсянь шойччан луньясө пыр лэччывлі вадорө. Зэв бур, кор аслад пыжыд эм. Но өд он кут найөс видзны дзебасын. Сёрнитчи аслам чери кыйысь ёртъяскөд, мед вөдитчөны менам веткиөн да кутөны сійөс син улын.

Но кыкнан веткисө сөсся арланьыс вөлі кодъяскө нуөмаось. А ки-коксө абу кольөмаось. Сідзи эз и дыр удайтчы вөдитчыны наөн. Меным весиг аслысногөн нимкодъ вөлі. Сідзкө шогмисны на кодлыкө менам важиник веткиясөй. А өні, уна во мысти, сөмын ас кежысь дивитлывлa Кылөг вад косьтыны зільысьясөс. Мыйла нө налы ковмис лэдзны тайө ыджыд тысьыс васө. Збылысь эз нин вөвны сэтшөм отаось вад гөгөрын видзясыс. И өдвакө удайтчывліс содтөд уна турун заптыны вадсө косьтөм бөрын. А сөсся эновтисны и тайө видзяссө. Сөмын бур тысө тшыкөдісны. И өні сійө өдйөджык кутас косьмыны, тырны эжөрөн да коркө-некоркө, дерт жө, бырас. А меным өнөдз овлөны жалъөсь сійө мича сынъясыс, кодъяс зілісны петны канал пыр Кылөг вадйысь Эжваө. Кыскө найөс небось вөлі паськыд вөляыд. А чери кыйысьөс кыскө чери дінө. И быдөнлөн аслас туй, аслас олом, быдөн ассьыс сөйө. Кодлы мый удайтчас.





# Гожся мойдын

Николай ЩУКИН

## Видз вылын

Чужан муын гажа гожом,  
Сиктса челядь сылы рад.  
Ставон ёнось, ставон чождось -  
Воис турун пуктан кад.

Видзьяс вылын сёрөдз  
Уджлөн кылө гор.  
Чукөртчывны корө  
Ёсь гөлөса горн.

Шыльыд видзлөн помыс абу,  
Кыптө зорөд лунысь-лун.  
Сиктса челядь абу лябось,  
Некод гортас көть оз мун.

Чужан муным миян ыджыд,  
Мича сылөн олан гор.  
Верстьё йөзлы тэ бур мыджөд,  
Сиктын быдмысь ичөт морт.

Снимокъясыс  
Полина ПАНЮКОВАЛӨН





## ВӨЛӨМКӨ

Отпускалан да каникул кадө вөзъям төдмасыны Сьод саридз йылысь шензьөданаторйөн. Саридз йывсьыс медводдза казъ-тылөмъяс паныдасьоны миян эраөдз 5 нэмын.

# Төдван-ө ставсө Сьод саридз йылысь?

\* Сьод саридзлөн важся греческөй нимыс - Понт Аксинский, вуджодны кө - «Негостеприимное море». Чайтöны, нимсö пуктöмабсь навигациякөд йитчөм сьокыдлун понда. Бөрүнджык нимсö вежöмабсь Понт Эвксинский вылө, вежортасыс - «Гостеприимное море».

\* Сьод саридзын эм кык вабергач, гы кузътаыс - 350-400 км. Океанолог Николай Книпович нимөн, кодi медводз висьталiс вабергачалысь схемасö, визувсö нимтiсны «Очки Книповича».

\* Сьод саридзын олысь ыджыд сьод акулабс шуоны - ема-сьысь катран акула. Сийö полö йозсьыс да гежöда волö берег дорö. Акуласьыс мортлы колö повны бытшласян борд понда.

\* Сьод саридзын олысь чери-ысь (нимыс морской дракончик) колö повны. Мышвывса бытшла-сьысь борд пиас да нөкчимас (жабрыас) эм ён яд. Сидзжө колö повны скорпенысь да ядөвитöй бöжа скат-хвостоколысь. Бөръясö шуоны рыба-котөн.

\* Сьод саридзö быдсяма пемö-сьыс локтöны Босфор пролив пыр да Дарданелла визулөн.

\* Сьод саридзын öти ыджыд полуостров - Крымский.

\* Сьод саридзса ва быдмөг (водоросль) сикас пыин эм «ночесветка». Сы понда мукöддырйи август төлысьын саридзыс быттьö югъялө.

\* Сьод саридзын 150-200 метра пыднаын некутшөм ловъя олөм абу (торъя бактерия кындзи). Помкаыс - саридз пыдöсын эм сероводород.

\* Сьод саридзын олө 2.500 сикас олысь. Тайö зэв этша. Шуам, Средиземнöй саридзын олө 9.000 сикас. Сьод саридз пыдöсын олөны мидия, устрица да моллюск.

\* Сьод саридздорса гөраяс пыр быдмöны, а саридзыс пыр туö-быдмö. Гөраяс кө сöмын некымын сантиметра сё воён, то саридзыс сё воён 20-25 сантиметра. Таманьлөн важся каръяс вевттьысисны нин саридз пыин.





**Виль  
КЫВБУРЪЯС**

Вячеслав БАБИН

**Чил**

Дыр ме бөрйыси, юр жуглі,  
Кутшөм ним и сетны друглы.  
Тонө сійө петіс чомсьыс,  
Көсйө мынтөдчыны домсьыс.  
Кодөскө пыр авзө-увтө,  
Омлялө на, он и сувтөд,  
Сэтшөм гораа да нора.  
Гашкө, виль ним пукта - Гора?

**Кокньөд**

Батьө козьналіс планшет,  
Менө кокньөдыштны мед.  
Сөмын небөгьясыд помысь  
Мортыд тэысь пө оз пет.

Өні пө компьютер нэм,  
Озджык песны ков юр вем,  
Личкин колана кизь вылө -  
Аддзан абу мый и эм.

Телевизорыд оз ков,  
Видзөд, мыйсө корө лов.  
Көсьян - гижась, көсьян - снимайт,  
Өтуввезйө пыр, эн пов.

Тайө эськө, батьө, бур,  
Сэсся ог нин вильшась, дур, -  
Менам воча сэки шусис, -  
Но тай колан кизь оз сюр.

**Дзу**

Апья чөдсө и ог пөт,  
Дозйө - роз, а вомө - мөд.  
Чөскыд тусьысь кор и ума,  
Кор и тырлас бердтөм чуман?  
Кывйөй весиг лоис сьөд,  
Но и вотчысь, юмов рөд!  
Тадзтө ковмас уна лун на,  
Мед варенньө мамлы пуны.  
Гортө, чайта, дыр ог мөд,  
Жальөн коляс кисьмөм чөд.  
Оз, оз мунсьы тусяиньысь -  
Гажөй бырис витаминьысь.





## Вöля

Кор вöля кылан, лоан дзик выль мортөн,  
И олөм-вылөм выльöс он нин кор тэ.  
О, кутшөм кокни, некод кө оз личкы,  
Öд ачыс Енмыс, шуны поэяс, сідзкө.

Но тöждысь-нартысь быдлунъяысь мынны  
Тэн ковмас уна кужöмлун да вын на.  
Сэк сөмын лолад вöля бисö пестан,  
Тэ кодыр вывтiасьысь этшсьыд асьтö мездан.

## Козин

Моздор тыр дзоридз кө вая, эн шензьы,  
Мый сэсся тэныд виччысьны менсьым.  
Абу ме озыр и абу ме чина  
Козьнавны зарни либö машина.  
Ичöтик козиныс, кодi тай киад,  
Лачаөн, эскöмөн, сьөлөмсянь сийö.

## Виччысьöм

Мöдлапöлын бипур -  
Войколалö кодкö.  
Бур жö делö тайö,  
Весяс кад оз лот кө.

Аски кыйдöс ваяс  
Нюмъялигтыр гортас.  
Везитыштiс, - шуас,  
Со и шуда мортыс.

А вот мыйла меным  
Оз и везит некор.  
Шуд кор шедлас киö,  
Пыр и лэбзяс сэки.

Локтас шудлун лэбач,  
Виччыся, ог вод кө.  
... Мöдлапöлын бипур -  
Войколалö кодкö.

«Коми йöзöдчан керка»  
Коми Республикаса  
автономной учреждение.  
**Веськöдлысьлысь**  
**удж вöчысь**  
**Е.В.ПЛЕТЦЕР**  
**Гл.редактор**  
**Г.В.МАКАРОВА**

Газет панысь:  
Печать да юөр сетан Коми  
Республикаса агентство.  
Регистриуйтöма  
2007 вося ноябрь 28 лунö  
йöзлы юөр сетöм да  
культураса озырлун видзöм  
кузя оланпасьяс  
збыльмöдöм бöрся  
видзöдысь федеральной  
службалөн Беломорской  
управлениеын.  
Регистриуйтан пас:  
ПИ №ФС 3-0686.  
Социальной тöдчанлуна  
гижöдъяссö йöзöдöма «Коми  
йöзöдчан керка» автономной  
учреждениеы печать да юөр  
сетан КР-са агентствоөн  
вичмöдöм сьöм вылö.

### Редакциялөн адрес:

167982, Сыктывкар,  
К.Маркс улича,  
229-öд керка,  
401-402 кабинетъяс.  
**Тел.** 24-12-22, 24-36-49.  
**E-mail:** Yologa@mail.ru

**Редакцияын**  
**уджалысьяс:**  
**том йöзлөн мытшöдъяс**  
**юкөнөн веськöдлысь –**  
Надежда Пунегова;  
**письмö юкөнөн**  
**веськöдлысь –**  
Екатерина Микушева.

Медводдза лист бокас  
снимокыс  
Ирина  
Кармановалөн.

Авторъяслөн мөвпьяс оз  
пыр лöсявны редакциялөн  
видзöдласкөд.

Тираж – 396  
Гижöдчан индекс – 52099.  
«Йöлöга» газет петö  
1991-öд восянь  
вөжоннас öтчид, комиөн.

Печатьö кырымалан кад:  
график серти – июль  
тöлысьлөн 2-öд лунö  
16 часын; кырымалöма  
печатьö 16 часын.  
Газет печатайтöма  
«Коми республиканской  
типография» ООО-ын дась  
оригинал-макетъясысь.  
167610, Сыктывкар,  
В.Савин улича, 81  
Заказ №





*Кажитчө тэныд ныв, но он төд, мый йылысь ськөд сёрнитны? Дерт, кык кыв кө он куж өтлаөдны, весиг озыр көшелыд оз отсае - нывлөн сьөлөмө он пыр. Вөзьям некымын нырвизь, мый йылысь позьё сёрнитны абу на ёна төдса нывкөд.*

## Машина

Абу кө нывлөн некутшөм машина да оз кө косьи босьтны право, дерт, машина йылысь сёрнитны сийө оз кут. Но позьё висьтавны, шуам, кутшөм машина тэныд кажитчө, медбөръя нималана модель йылысь.

## Привычка

Дерт, гыж йирөм йылысь нывлы висьтавны оз позь. Позьё шуны сэтшөмтор, мый выло позьё сералыштны. Шуам, мый радейтан телефонён сёрнитигөн серамбана чужомъяс вөчавны.

## Сьом

Кызди судзөдны сьом да колана ногөн видзны, мукөд странаын йөзлөн сьомён вөдитчөм - позьё та серти сёрнитны. Но мед оз тыдовтчы, мый тэ горш либө он куж колана ногөн сьомён вөдитчыны.

## Челядь

Сөмын на төдмасьом нывлы эн шу, мый көсьян куим челядьос



# Мый йылысь сёрнитны нывкөд?

лөсьөдны да бөрйин нин налы ним - повзёдан мусатө. Эн и шу, мый ньоти он радейт челядьос.

## Гортса пемөс

Позьё юавны, кутшөм гортса пемөс сылы кажитчө. Коді видзө гортас кутшөмкө пемөс, найө ооктапырысь пырөдчөны татшөм сёрниас.

## Төдөмлун

Верман шензёдны чужан мукөд йитчөм история йылысь төдөмлунөн, висьтавны кутшөмкө важся керка йылысь, кутшөм нималана йөз сэни олісны.

## Сёян-юан

Пөчлөн чөскыд пөжас либө суйорсайса шензёдана сёян - позьё та йылысь сёрнитны. А

гашкө төдан, кутшөм кафеын дасьтөны медчөскыд кофе? Тайө нөшга өти помка паныдасыны.

## Дзоньвидзалун

Интернетын диетология кузя уна вөзйөм эм, да и кызди дзоньвидзалун бөрся дөзьөритны. Сідзкө, верман петкөддыны ассьыд төдөмлунтө индөм нырвизьын.

## Кино

Кино тема некор модаысь оз пет. Радейтана кино, режиссёр. А нөшга на кө нывлөн радейтана киноысь кутшөмкө нималана сёрникузя либө кывтэчас шуан - быть кажитчан сылы.

## Небөг

Висьтав радейтана небөг йылысь. Юав, кутшөм гижысьлысь творчествосө радейтө.

## Паськөм

Верман ошкыштны нывлысь паськөмсө. Но уна ныв оз радейт, кор зонмыс унджык төдө мода йылысь, нималана дизайнерьясөс.

## Спорт

Олимпийскөй ворсөм, кажитчана спорт сикас. Вөзйыны, кор бурджык котравны - асывнас либө рытнас.

## Эскөм

Висьтав ассьыд видзөдластө видзчысына, эн дойд мөд мортөс, өд быдөнлөн аслас видзөдлас та серти.

## Путешествуйтөм

Верман юксыны кутшөмкө серамбанаторйөн, мый тэкөд овліс мөд странаын отпуск дырйи.